

BUSINÀ 85°

2009-2010

(Bellinaso Fabio – Raiteri Pier Luigi)

Buna sira, buna sira me cari siuri... E bén, c'mè c'la va? Uarda te, u smejia ieri c'as suma vist e a l'è zà pasà in atr'ani; e cun ist i son utòntasing, utòntasing ani c'a fuma 'sta Divòta Cumedia. Nuiater a j'uma intension d'andè avònti ancora sent'ani, perchè s'i v'a stufi nénta voi ad vigla, figürumsi noi ad fela. Però a son pròpi cuntent ad vigvi: i stéi bén?

E cun l'influenta c'mè ch'i l'ei rangiaia? Uarda te che tücc j ani u na j'è jëina nova... prüma la cineisa, pó' la giapuneisa, l'ani pasà l'aviaria, cula di pulaster... ist ani la suina, cula di ghen... Ma a digh, i pudivu nénta dèj in ater nòm, per fè nénta amni fora di pastis?! Pensè che l'ater di in me amis u m'ha dicc: "Uarda te, a l'era trònt'ani c'andava pü an vacònsa, a son andacc veja cun me mujè e a son turnà a cà cun la suina...". Ui manca ancora cula dj asu: che cun tücc cui c'u j'è an gir, ater che la pandemia! E ònche me a son preocupà: i sei meja che fen c'l'a facc el pont 'd la Sitadéla? No, perchè a son stacc veja da Lisòndria per an pò' ad temp e quòndi c'a son rivà per avnì chi an teater, a j'hó pü vist el Pont? E c'm'el Padre Guardiòn, a j'hó pénsà: i l'avròn meja gratà?

Ma lè d'auvsen u j'era in munsü c'u m'ha dicc: "Ma Gilindu, andó 't eri 'st'istà?". "A son stacc an vacònsa col bëci, perchè?". "Perchè i j'hòn spicià che i lisòndren i partjsu per el vacònsi e i l'hòn tracc zü". Ma uarda te, am son dicc, a l'era nénta stacc bon ad andè zü da sul e lur i l'hòn tracc zü! La quistion a l'è che piòn pianen ui sparis tücc i simbul ad Lisòndria: prüma la ciminiera ad Bursalen, adès el Pont 'd la Sitadéla...: a j'hó ant la ment che ònche el cavà c'u j'è ansüma al monument ant i giarden, el pó mea stè tònt tranquil!

El prublema a l'è che el pont i l'hòn tracc zü, ma i sòn nénta quòndi ch'i sarròn bon a tìrel turna sü; i sòn pròpi nénta c'mé ch'i devu fè el pruget del pont. Oh zà, perchè ant el prüm pruget, is son sbajà a piè j'amsüri e acsé a l'era trop long. Praticament el duiva pàrti da Via Dossena e el finiva andrenta a la Sitadéla. Però u Sédich e j'asesur i j'hòn dicc ad stè tranquil perchè el prublema i son nénta i sold e gnòncia Sgarbi c'l'è rivà chi a Lisòndria a fè in pastis d'asident; no, lur is son bütà an cuntat cun Ruma e is son bütà d'acordi perchè adès ch'i costruisu el Pont an su Stretto ad Messina, s'i na vansu in tòc, im la dòn a gratis!

I j'hòn dicc ònche che tònt ch'is decudu, i j'hòn ant la ment ater doi pruget: el prüm a l'è cul ad spustè la Piscina, acsé coi doi tòc vansà del Pont

i risparmiu an si trampulen; e l'ater a l'è anveci ad fel 'dventè el Ponte dei desideri: sé, perchè i j'hòn senti in munsü c'l'ha dicc ch'el funsiouna da bon, lü a l'era andacc lè ansüma cun só suocera a fè del futugrafij e quòndi c'u s'è girà andrera a j'era pü!

Uardè però che cun in pont an menu, u j'è stacc di gròn cambiament an sla viabilità. Tònt per c'mensipiè, quòndi che 't rivi a Lisòndria la mateina e 't ei an coua d'an quart d'ura an Via Giordano Bruno, u j'e di cartel ch'it disu 'per evitare le code usa la tangenziale'; ma c'mèla, im fei rivè fin a lé per dimi c'a duiva piè la tangensial: e dimli prüma, no?! E pó' se la tangensial a l'è nént finia, ma se ch'i vori: piè an gir?

E pó', i j'ei facc cas che quòndi che 't rivi d'ad nan au Liceo Scientifico o quòndi che 't ei an circumvalasion, at póri ammachi andè dricc o girè a dricia? Da quòndi che l'Aministrasion a l'è ad centro destra, gnònc se 't vori it fòn andè a sinistra! I voru fina mudifichè tücc i sensi unici!

A pruposit del Ponte Tiziano: che pastis...adès andò ch'i pasavu du machini i na pasu trè e là an fond, quòndi che la strà a sa strens, dauvsen a la rutonda u j'è sémp la coua; ma la roba pü bèla i son cui semafori ch'i j'hòn bütà lè ansüma: i sei perchè ch'i j l'hòn bütà? Av la dig mé: perchè i j'hòn intension ad fè ònche chi a Lisòndria in Gròn Premi ad Formula Uno! C'mé a Montecarlo! I j'hòn quasi decis el percurs: la partenza ansüma au Tiziano, lur i j'hòn la cürva del Tabachen e noi a fuma cula del Maslè, pó' us pasarà dadnòn a la stasion, el pit stop il faròn a la Valfrè dop la variante Esselunga, la parabolica an fond a Curs Quat Nuverber e l'ariv i voru büteli ant el parcheggio del Panorama... A pruposit, i j'ei zà pruvà ad andèj andrenta? Cuc ani fa am lamentava per el parcheggio ad Via Parma perchè a l'era dificil entrè, chi el prublema a l'è sorti! At c'mensi a girè a dricia, pó' a sinistra, pó' turna a dricia, e prüma che 't abi capì la strà per andè a cà, at vighi da bon tütt el Panorama!

U j'è da dè, però, che Lisòndria la sta 'dventònda sémp pü bèla; i j'hòn rangià la Piasèta, adès i son ancor 'drera a finì Curs Ruma: c'mé c'u diva la publicità ch'i avu stüdià quòndi ch'i j'hòn c'mensà i travaj? Ah sé, 'Siamo partiti': adès a poduma ammachi sperè ch'i rivu!

E Piasa Marconi? L'ani pasà an pòc temp l'era 'dventaia in bosc, adès u smeja d'esi ant la savana! Speruma che na bèla giurnà ui riva nénta i lion al post di gat, sednò um tuca ciamè Tarzan per rangè la quistion!

Però i j'ei vist che bèla Lisòndria ant el Festi ad Nadal? Tüt el luminari e i mercatén. Pensè che tütà prüma j'avu pensà ad fè per l'ültim dè dl'ani i fó artificial an Piasa dla Libertà, e u Sèndich a l'ava ciamà al Posti ad fei parti da lur per fei rivè ansüma al Munisipi; però el Posti i j'hòn dicc c'ad no, perchè cun la lentèsa ch'i j'hòn, u j'era giog ad sparèi l'ültim dè dl'ani e ch'i riveisu per l'Epifania! Anlura u Sèndich a l'ha pensà ad fè balè tücc i

lisòndren an Piasa Garibaldi, perchè a j'hó alsì an su giornal che Lisòndria la sarà an pó' c'mé Chicago. Ma me a digh: i pudivu nénta sèrni in mudel pü pulid?

(GIOCO DI LUCI)

No, preocupèv nénta: a l'è u noster tecnic c'u s'era smentià ad tachè el decoder...Ma lasla buj! Uarda che 'sti siuri i j'hòn pagà el bièt e i voru vighi bèn 'in alta definisione e col digitale terrestre'!

E sé, perchè au di d'ancò us capis pü gnénte. Per vighi la television ui va sés o sèt telecomandi: cul 'd l'antenna nural, cul del digitale, cul 'd la parabola, e el television i son sémp pü strici.

L'ater di a son rivà a cà d'in mé amis e a j'hó dicc: "Uarda che bèl quader che 't hai tacà a 'sa miraia". E lü u m'ha rispundi: "Gilindu, ma se 't disi, at vighi nénta ch'l'è u televisur nov?!". A son armast meraviglià: la sarà stacia larga in centim, na vòta i j'eru di scatulon gros acsé.

A suma 'dventà tücc pü tecnologici, ma me um a smeja ònche pü gnurònt. Ormai u j'è 'd cui là ch'i són gnònc pü bon a andè a crumpè u lacc s'i drobu nénta u navigatur, acsé i poru ciamè la mujè co'u telefonen per dij: "Amore, arrivo previsto tra sette minuti"!.

E i giuvu: is parlu gnònc pü ansema, no ormai i cameinu tacà long la strà e i sa scrivu i mesagén: TVB IDP CVD... L'ater di a j'hó ciamà a me fiò Narcis: "Ma che lengua c'a l'è, italion, cineis o cula del bëci? E lü, u m'ha dicc: "Ma papà, a scrivuma ammachi la prüma lettera per nént perdi du temp TVB - At voi bèn...IDP - me pü tònt ancora, acsé a fuma prüma a scrivi...". Sé, forse a scrivi, ma a lesi? U smeja in rebus!

E l'atra nuvità a l'è Facebook? I sei se c'l'è? L'ater di a parlava cun Mafè e ai dsiva: "Uarda che me a cunos in mugg ad gent, per esempi Pipu el maslè, Giuani el Panatè, Cicotu el mès da bosc...". Lu u m'ha fermà e u m'ha dicc: "Gilindu, noi ant el gruppo 'Cui del Butalen' a suma ventisingmila amis ant el mond e a risiuma mai!".

Nént c'mé i noster pulitic a Ruma chi i s'anventu sémp cuc cosa per rüsiè: Fini cun Bossi, Bersani cun Casini, Di Pietro cun l'italiòn... Us capis pü gnénte, i j'hòn fina trovà di pulitic ch'is drugavu, acsé i j'hòn decis ad fè la prova del capello. Ammachi che quòrni che l'è stacc el turno ad Berlusconi, u j'è partì vea tüt el tupè e l'è armas bèle platà.

Ammach an s'in argument u smeja ch'i abu trovà l'acordi: zà che ant u doimilanóv u j'è stacc la crisi economica, ònche i pulitic i j'hòn decis ad fè cuc cosa e ad tajè el speisi per le auto blu; acsé basta cul machini gròsi c'mé le Audi, le Bmw, le Mercedes! I j'hòn decis ad sòrti tücc cun la Ford: Berlusconi cun la Escort e Marrazzo cun il Transit...

Per furtëina noi a stuma chi dai frà e cert robi ai pensuma pròpi nénta. Ma il

sei che ist'ani i j'eru tücc preocupà chi an convent? El padre Guardion u s'è antajà che an cesa ui mancava sèmp el ven per d'i la mësa e anlura a l'ha c'mensà a pensè chi ch'el pudiva esi a gratè el ven, e pénsa ancò e pénsa admòn, na bèla giurnà, tac!, u s'è anviscaja la lampadeina e u s'è dicc: "A vot vighi c'a l'è cul delinquent du sacrista?". Anlura ul ciama e ui dis: "Pidren, ven an pò' an sa, che ancò at devi cunfesèti!". E Pidren ui rispond: "Ma no Padre..., am son zà cunfesà l'atra smòina, a j'hó facc gnénte...". "No, no, a t'hó dicc d'avnì chi ant el cunfesiunal". Anlura Pidren el va là d'auvsen, u s'a snugia e el frà ui dis: "Cunfesa, nèh che 't ei te che 't grati el ven an cesa?". E Pidren: "Padre, us sent própi gnénte". "C'mèla c'us sent gnénte?". E Pidren ui dis: "Uardè Padre, fuma còmbi, me a ven da la so part e lü el ven da chi". Anlura i cambeiu post e quòndi c'us sèta, Pidren u dis: "Padre, nèh che a l'è ses meis ch'im paghi nénta u stipendi?". "Oh, us sent pròpri gnénte da bon!" Avei pasiénsa, ma a suma ant in mond andó, da chi a cuc ani, magari im ciammarròn ad gavè la crus ònche dal cesi e anlura a voi ringrasiè i noster Frà per tüt cul ch'i fòn per la povra gént; speruma ch'i s'a stufu nénta ad purtè an gir el mudèl ad Sòn Fransësc.

Va bén, adès a la piònt lé ad fè la predica, ònche perchè a l'è nénta el me amsté, e av present la me famija...